



Sesida dals

27 d'avust 2024

Communitgà ils

29 d'avust 2024

Protocol nr.

696/2024

Incumbensa Schneider

concernent il pajament automatic da la reducziun individuala da las premias

Resposta da la Regenza

1. Dapi l'introducziun da la reducziun individuala da las premias (RIP) l'onn 1996 è l'Institut d'assicuranza sociala dal chantun Grischun (IAS Grischun) responsabel per l'execuziun da la RIP. Dapi lura è tant la legislaziun federala sco er la legislaziun chantunala vegnida adattada pliras giadas. Sin plaun chantunal è l'emprima prioritad adina stada quella d'exequir la RIP en moda simpla, convergenta, effizienta e favuraivla per tut las parts involvidas, en spezial per las persunas che survegnan ina RIP. Correspondentamain èsi facil da s'annunziar tar il IAS Grischun per survegnir la RIP. Il dretg d'ina RIP po vegnir fatg valair online sur la pagina d'internet dal IAS Grischun u sin via convenziunala cun in formular d'annunzia. En il chantun Grischun vegn il dretg d'ina RIP – suenter in'emprima annunzia – eruì automaticamain e communitgà als assicuraders da malsauns. Plinavant èn las filialas communalas da la AVS emprims posts da contact per dumondas e per cussegliaziuns. Ellas gidan las abitantas ed ils abitants ad emplenir l'annunzia per la RIP e transmettan quella al IAS Grischun.
2. Il chantun Grischun enconuscha l'uschenumnada procedura da pajament anticipà. Sche persunas s'annunzian per ina RIP e sche la taxaziun da taglia definitiva da l'onn precedent n'è anc betg avant maun, cura che l'annunzia vegn elavurada, vegni examinà, sch'igl exista in dretg d'in pajament anticipà. Sch'in tal dretg exista, importa la prestaziun anticipada 65 % da la valur calculada. Cura che la taxaziun da taglia definitiva da l'onn precedent è avant maun, vegn il dretg calculà definitivamain e lura disponì. Suenter l'emprima annunzia restan persunas cun dretg d'ina RIP en la procedura automatica, fin ch'il dretg scada pervia da midadas famiglias u economicas essenzialas. En il chantun Grischun pon ins s'annunziar per ina RIP durant l'entir onn chalendar fin a la fin da l'onn.

Tenor l'art. 9 al. 1 da la Lescha davart l'assicuranza da malsauns e la reducziun da las premias (LARP; DG 542.100) reducescha il chantun Grischun cumplettamain las premias decisivas per persunas che retiran prestaziuns supplementaras

tar la renta da la AVS/AI, che survegnan sustegn dal maun public e che retschai-van contribuziuns da maternitad. Questas gruppas da retschavidras e retschavi-ders vegnan annunziadas d'uffizi, saja quai tras il IAS Grischun (en cas da presta-zions supplementaras), tras l'autorità communal d'agid social (en cas da sustegn dal maun public) u tras l'Uffizi chantunal dal servetsch social (en cas da contribu-zions da maternitad). Quai vul dir ch'i n'èn visibels nagins obstachels nunneces-saris per persunas che dovran il pli urgentamain ina distgargia finanziaria en furma d'ina RIP per pudair pagar las premias da l'assicuranza da malsauns, perquai che la RIP vegn eruida d'uffizi e transferida als assicuraders da malsauns. L'onn 2023 ha il IAS Grischun pajà RIP en l'atezza da totalmain 115,1 miu. francs. La cum-part per las trais gruppas menziunadas qua survart importa 39,7 miu. francs resp. 34,5 %.

3. Tenor l'art. 65 al. 3 da la Lescha federala davart l'assicuranza da malsauns (LAMal; CS 832.10) ston ils chantuns procurar che las relaziuns economicas e famigliaras actualas vegnian resguardadas a chaschun da l'examinaziun da las premissas per il dretg d'ina RIP. Igl è pussaivel d'eruir il dretg d'ina RIP suletta-main sin basa da las datas fiscalas; quai stat dentant en cuntradiziun cun il dretg federal.
4. Ils set chantuns che erueschan automaticamain il dretg d'ina RIP per tut las paja-taglias ed ils pajataglias, communitgeschan quai a las persunas cun dretg d'ina RIP cun agid d'in certificat da dretg da retratga (CDR). Qua tras na resulta nagin dretg definitiv. Las persunas cun dretg d'ina RIP ston far valair la RIP cun il CDR tar l'organ executiv cumpetent. Per la calculaziun na vegnan resguardadas ni las datas fiscalas actualas ni las relaziuns famigliaras actualas. En la cumpareglia-zion interchantunala dispona il chantun Grischun d'ina procedura RIP fermamain automatisada e fitg effizienta.

Sa basond sin questas explicaziuns propona la Regenza al Cussegl grond da refusar questa incumbensa.



En num da la Regenza

Il president:

Dr. Jon Domenic Parolini

Il cancellier:

Daniel Spadin